

國
朝
詩
鐸

國朝詩鐸卷九

錢唐張應昌仲甫選輯

科派

馬船行

陸世楷

南人使船如使馬北人用馬還用船將軍驅馬一萬匹
載馬直須船一千千船費金約五萬其價殆與馬等焉
此金那得出公帑下牒直索民間錢官胥牙僧半飽橐
馭兒賣婦誰爲憐粵中盜賊利舟楫千頃蒼茫凌一葉
江邨遙望隔波濤驕驪雖健難追躡北師藉馬方成功
豈知馬更藉船通何如用船且舍馬伏波橫海名猶雄

黃金費盡龍媒蹶殘樗蕭蕭閒廐卒馬船已朽馬骨高
朝漢臺邊嘶夜月

貧婦歎

彭孫通

姑蘇城外清壕上大者官船小客舫鱗集雲屯晚未休
風鬟霧鬢來相倚向船長跼淚四垂手攜弱女懷抱兒
行人問婦何所苦斂衣起立徐致辭家住毘陵北山裏
良人本是千金子自有田廬樂歲時還餘僮僕供驅使
一朝不幸值踐更縣符府檄何縱橫官家稅一吏稅五
里胥谿壑猶難盈忽聞征南大兵至趣令軍需倉卒備
催符如雨絡繹來此時漫說新安吏二月新絲三月數

賣田不給還賣屋。僮僕逃亡家計無。良人淚盡雙眼枯。
遮莫無由棲故里。竭來乞食走吳趨。吳趨客店聊饘粥。
計食千錢過一宿。兩兒三女年比肩。飢來只解牽衣哭。
七口艱難仰一人。他鄉况是婦人身。已知旦夕填溝壑。
尙忍須臾訴苦辛。語畢還聞嗚咽久。逡巡似愧紅顏厚。
哭聲錯雜未分明。說苦終時不去口。可憐天地未休兵。
江南往往多橫征。安能刻日銷金甲。處處春風鼓腹聲。

買穀行

鄧鳳喈

風吹部門草。蕭蕭鄉中老翁來。買穀白頭赤腳走中途。
手攜女兒淚。蔽蔽軍帖要備三年糴。縣官限期追積貯。

官差入門怒如虎。此曹甯知百姓苦。去歲流離遭干戈。
今歲無雨乾殺禾。十家九家火不舉。老翁子亡遺一女。
鬻女買穀輸官倉。輸入官倉供雀鼠。

鴟上屋謠

又

夫應徭子戍軍。軍書插羽催紛紛。田間禾黍歇婦女在。
家嗥昨夜通和使者來。官軍取給牛羊雞。雞喔喔。狗鯨
鯨。樹底老鴟飛上屋。

江邊行

吳嘉紀

江邊士卒何闐闐。防敵用船不用馬。督責有司伐大木。
符牒如雨朝暮下。中使嚴威震舊京。軍令還愁不奉行。

親點猛將二三十帥卒各向江南程江南誰家不種木
到門先索酒與肉主人有兒賣不眠供給焉能饜其欲
老松古柏運恩促精魂半夜深山哭一一皆題上用字
樹樹還令運出谷出谷到江途幾千將主騎馬已先還
家貲破盡費難足衆卒仍需常例錢道路悲號不住口
槎枒亂集成山阜一朝舟楫滿沙汀只貴數多不貴精
君不見揚州戰船六百隻輸盡民財乘不得寒潮寂寞
葦花間日暮灘頭渡歸客

送馬吟

田雯

桑乾道交河野羽箭材官南送馬太僕火印何權奇

瘴鄉不產龍媒姿 一行五百匹日馳百里農夫剝草
婦子汲水 官府來何方打鼓屠羊鞭箠在手意氣揚
揚 芻豆供給苦不足獵犬羈鷹飽餘肉送馬者去吏
索錢農夫鬻牛婦子哭

沈歸愚曰寫盡農家供官之苦

柳梢行

姚文燦

春風楊柳枝枝綠秋風楊柳枝枝禿黃河嚙隄塞敢後
捲柳爲簾高於屋府帖下縣縣下邨邨小亦需數萬束
出柳之邨仍送柳丁男盡挽牛車走流汗舉踵不少休
載取民膏到河口吏胥收柳橫索錢無錢自向河邊守
嗟乎百姓雖勞烏可已瘁瘁莫怨黃河水君不見昨歲

江南造海船伐木丁丁數千里。

御馬來

又

御馬來御馬來自黃金臺。天閑上廐雲錦堆。日行數十里。毋使馬虺隤。節度出境點馬匹。太守迎馬駐荒驛。縣令督民築沙隄。排沙不許雜瓦礫。瓦礫雜時傷馬蹏。沙隄築就勞民力。但得馬無恙。民勞安足惜。未知此馬臨戰陣。可能成功竟無敵。馬過百姓甫安睡。明日按畝派馬費。

前修塘謠

鈕琇

朝聞官兵至。暮下修塘檄。官塘不修墮軍機。官塘修時

民孔戚泥一斗輒一箕負之擔之向水涯盡是塘夫膏
與脂皇天不識塘夫苦淫雨增波鬻塘土大官督修急
如火杵聲薨薨築且堅復索私例血流鞭泣言大官幸
勿喧囊中尙有賣兒錢。

後修塘謠

又

官塘修平如砥馬蹏趵行不休官塘蹋入瀕湖水大
官親勘怒何赫口道塘夫用無益派稅民田須滿額錢
歸石工去採石石工徵錢態復驕椎牛醢酒日逍遙塘
邊零落貧家子稅重田荒饑欲死哀聲不入石工耳

點夫行

管 掄

夜投龍里縣喧呼聞點夫三戶成一舖五舖當一隅遠
者來百里近者沿山居排摧保仍押弟去兄相扶奔疲
面目黑負背形神枯水深泥沒踝衣破肩無膚苦情不
敢說欲語先嗚嗚自從寅卯後寇賊盈邨闔毀廬委榛
莽殺人棄土苴十室九死竄一日千徵輸官軍從東來
逐賊如驅雛畋漁本民命幸者俘爲奴承平十四年稍
稍聚子孤哀鴻始來集僵骸行將敷前歲忽時變蠢爾
倏負隅山邑大騷動鞭撻紛街衢自此供億苦從朝抵
日哺或歌采菽什或征皇華車或宣揚明詔或拜爵遷
除動輒計千百要不有錙銖今年更大數十日九長途

山田正插時不能把耒鋤夜半打門叫驚走號妻孥雞
犬飛上屋牽走甯須臾黃塵赤日道列火燒洪爐山高
更磽确路遠還崎嶇又聞昨前站死者非形癯大都舉
家竄何苦傷微軀縣官聞亦苦終日相奔趨國賦旣不
足典質無釵綸沿家苦哀諭閉戶如視膜出財用民力
民困其奚如黽勉存喘息恐亦淪溝渠我聞斯言苦太
息長歛歛用一緩其二昔人言非誣子來不終日此獨
非民歟觀風知大概所係非區區何人鄭監門上書并
繪圖

管榆鷓鴣灘紀事見丈量門

市丁行

朱樟

赤腳市丁真可憐

土人謂之赤腳丁

里正催納排門錢

亦曰排門丁

一身飄蕩覓衣食縣籍有名勾不得追呼東舍及西鄰
多說市中無此人長官新來議幡改名目雖除稅額在
有賦例隨田上行計畝加派無重輕鄉丁皺眉市丁喜
偏枯之政徒爲爾譬如十指長短生痛癢何曾分彼此
市丁樂官不知鄉丁苦姑言之去年秋旱雨不下今歲
霜早禾熟遲小家門戶苦不保只在青黃未接時

敝車行

宋銑

瘦馬如堵牆敝車如破屋軸欹輪半缺中路行不得問

之不敢言欲言已先哭云本邨中民養馬聊代犢春犁
陌上田秋負輸倉粟闔家四五口粗可供饘粥一朝忽
傳符官差占輿輻青衣兩長官入門張怒目左手擲銀
鐺右手持文牘朱書若盤鴉一一爲我讀某邨車若干
去人毋許宿鄰里前致詞公事敢辭役邨民有苦情長
官當俯燭前街多富豪後巷住宦族連羣畜肥騾結隊
騁長轂胡勿向彼言而來窮戶督長官乃大呼小人敢
爾瀆官今坐堂上網羅休自觸有車而車當無車而身
贖聞言各驚惶相顧氣瑟縮隻輪與寸蹠計戶儘求索
烹我塢上雞春我國中粟吞聲且强笑僵僂相欵曲臨

行更釀錢。多少隨典鬻。區區未云敬。慎勿嫌齷齪。自從
到官來。曉夜窮奔逐。人日麥一升。馬日藁一束。人飢骨
零。丁馬飢尾禿。速兩全勢所難。生還願已足。行矣毋多
談。左右恐耳屬。不見黃塵飛。傳呼一騎促。

騾車行

孫士毅

騾車行何局。促縣官簽牌。吏夜捉吏下。邨里社哭雞鳴。
驚飛多上屋。騾論頭車論輻。五家一騾。草十束。十家一
車。車不足以騾償。車還帶犢。草多折官錢。車多折酒肉。
里長城中歸。強邀縣吏宿。社鼠憑城狐。公然擅禍福。吏
言迫呼嚴。長言戶口熟。騾肥吏索錢。騾瘦官怒扑。里長

中間手翻覆一騾派丁夫。一車雇邨僕。丁少還向別家
鬻。不知何官長朝暮空馳逐。危坐車箱中。無言怒以目。
爾怒以目我以腹。車郎當騾獨漉。一官過一路哭。

修堠謠

李憲喬

始安江岸側有婦行隨夫擔持畚與鍤。一身多泥塗我
行時借問夫言婦亦歎。烽堠設何爲使我連邨困。前夜
吏到舍叱喝府帖下一丁出百甗。十戶供萬瓦典盡兒
女衣。稍具甌瓦資更驅自轉運。營造不待時嗟我生爲
農舍業從墾工。田秧雖得插廢棄如枯葑。秧枯卽絕食
餓死行可必誰言。兵衛民我死彼卻逸。此邦雖邊鄙同

是天赤子樂歲有災凶皇天那如此國家久承平軍衛
豈宜輕願告守土吏勿使民恨兵

頭人謠

滇南新樂府
諸篇之一

汪如洋

官站需夫驛需馬簡派捐輸出鄉社一鄉一社一頭人
馬牙夫店充一身大差夫馬攤煙戶小差尋常一百數
浮開尅給利贏餘有差不若無差若有差派出民不驚
無差日日飢腸鳴入城官長笞入鄉鄉衆毆前站獮鬚
似虎虓此時頭人不如狗

市馬行

邵無恙

陰風颯颯烏雅雅縣官下鄉索良馬千金飾馬送達官

百金先送司閹者。閹者得金云馬好。縣官火急徵馬草。
胥來捉人草不足。落日縣門哭野老。爲謝野老豈得已。
縣官視民猶赤子。君不見驕驪駟騶驥。達官之門
門如市。

春臺篇

趙雷生

迎春扮春臺。此風不聞古。積弊沿黔中。乃爲民所苦。先
時有胥吏。斂財搜比戶。浸淫及市場。錐刀競商賈。虛詞
恣恐嚇。吞聲誰敢吐。屆期抵東郊。前後擁旗鼓。農官與
保介。衣裳濟楚楚。閭里良家子。頓作纖腰舞。刀槍劍戟
戈。天魔獅象虎。飾稱祈豐年。觀者環如堵。豈知盡錙銖。

一擲輕泥土何似順民情自足逐天祐

南山竹

龔 鉞

南山之竹青入雲一夜砍除心欲焚問君何事亟須此
織席遮馬迎將軍薄薄片薄薄織長夜不眠寒月白當
戶吏來催轉急祇須四百青銅錢買吏折納都慳然

瘦馬行

邑有徵發令戶出馬邨民某鬻女市馬以應官嫌馬之瘦也答之因取樂府舊題詠

其事以爲新樂府

孔昭虔

門前小吏持牒來門內嬌女唬聲哀兒女情輕官法重
賣兒買馬充官用官用不可稽簿尉嗔嫌遲出門重回
首欲去牽翁衣牽翁衣吞聲哭苦應官裏役舍卻心頭

肉荒邨歲儉輕紅顏換來瘦馬嘶寒煙馬瘦更求芻牧
錢枯尻獵獵鳴秋鞭不怨肌膚裂但痛骨肉別肌膚有
時完骨肉難重圓茅屋燈昏夜如水思女無眠半宵起
起來窗外聞嘯烏風前啞啞飛將雛

大車謠

吳慈鶴

大車焯焯曉行不見日夜行猶見星云送薪料赴河北
公使迫促無畱停大車三牛兩牝馬愛惜鞭笞不肯下
農家辛苦畜養來今日蹶穿血流踝傳聞大工需料二
萬垛各五萬運以五十車近者百里遠者數百里嚴
急不可晷刻踰豈無帑金發自少府所費太鉅仍資里

閭。可憐薪盡無以炊。爨猶自可。祇恐牛馬盡死來歲誰
留禽。

里下車

陳均

里下車。里長輸縣官徵役。朝下符打門。火急聞追呼。富
者賄吏免。貧者膏轄趨。無馬代以牛。有車還出夫。炎風
吹塵日炙膚。車不能進人挽驅。別有飽車牛並馱。負重
上坂行。踟躕石棱一蹶兩轆折。牛蹶脫落踏路隅。長官
怒牛鞭。鄉奴鄉奴長跪願受扑。但求稍緩牛須與死牛
可奉候。館肉生牛。留辦官家租。

擾累

鹿城吏

王 昊

打門鹿城胥云是郡丞使郡丞攝令篆新奉上官旨軍
興急秋糧連夕飛符委主人素習儒家世住城市僅存
百畝田未獲傷於水縱有饘粥資搜剔竭骨髓更慚供
晚餐僅可及二簋胥聞忽作聲汝言大非是吾昨過西
邨羅列遍雞豕今吾到汝家所飲寡水耳秋糧何必償
但須郡丞喜郡丞愛金錢汝家豈無此丞喜吾亦歡走
勞補瘡痍予也聆斯言入戶足如枳丞怒猶自可胥怒
民立死誰寫春陵行獻之 聖天子

墓樹行

吳農祥

江南打船斫大樹嚴檄浙河東西路十圍榆柳伐園林
百尺松杉斬邱墓豪家貴門惜不得下里單寒何足數
縣吏持籌點樹根號叫江邨小民懼深山大澤已零落
曲港疎籬空愛護龍頭虎死委道傍鳳棲鸞嘯隨霜露
嗟余先塚在蕭臺手植經營日百迴晝暝風驅千嶂合
夜深濤漲萬溪來今年里正報官早蒼稜紫榦珊瑚倒
丹砂官帖鐫皮膚數頃終傷不自保樵牧已今將十年
茶山楓徑無炊煙疎花野竹掃除盡江南萬里驚蕭然
北郭荒塋賸遺燒塚樹畱因天子詔饑寒或仗兒曹賢
摧殘應被穿窬笑聞道戰艦如山浮州府千樹徵諸侯

翰將不辭河伯力芟薤真作山靈羞摩杪華表心甘折
汨汨溪流助嗚咽白頭孫子立斜陽長慟無聲淚成血

養馬行

庚寅冬耿尙雨王入粵廣州居民避竄徙於鄉城內外三十里廬舍墳墓悉令官軍

築廐養馬梁子

哀之作養馬行

梁佩蘭

賢王愛馬如愛人人與馬竝分王仁王樂養馬忘苦辛
供給王馬王之民馬日齧水草百斤大麥小麥十斗勻
小豆大豆驛遞頻馬夜齧豆仍數巡馬肥王喜王不嗔
馬瘦王怒王扑人東山教場地廣闊築廐養馬凡千羣
北城馬廐先鬼墳馬廐養馬王官軍城南馬廐近大海
馬愛飲水海水清西關馬廐在城下城下放馬馬散行

城下空地多草生馬頭食草馬尾橫王諭養馬要得馬
性情馬來自邊塞馬不輕人有齒馬服以上刑白馬王
絡以珠勒黑馬王絡以紫纓紫騮馬以桃花名斑馬綴
玉鑲紅馬綴金鈴王日數馬點養馬丁一馬不見王心
不甯百姓乞爲王馬王不應。沈歸愚曰以贊頌之筆寫
其敗亡也必矣風刺之旨貴畜賤人如此

九嗟九首

張曾慶

一嗟運漢米萬里勞筋體雲山跋涉險輓輸日垂涕斗
米數千錢家家空如洗。

二嗟運漢豆棧道穿雲岫吏胥縱饕餮黔黎日消瘦粒

粒供戰馬。萬戶絕飢餒。

三嗟運漢夫。骨以不相扶。迢迢千里道。歷歷經崎嶇。大暑常暵死。大寒凍倒塗。

四嗟運漢驢。驢夫萬金餘。驢鳴如哀猿。夫役如枯魚。畜骨填溝壑。人骨生蟲蛆。

五嗟諸色匠。一一供兵帳。奸胥苦需索。漁奪千萬狀。稽留歷歲月。父母不得養。

六嗟運芻藁。寸莖貴如寶。非關騰市價。西成天不造。徵馬嘶櫪下。萬姓塗肝腦。

七嗟田園好。求售如芥草。有土三征累。無產一家保。催

科逃未得先業成煩惱

入嗟子女壯提攜鬻市上生女不字嫁生男不終養一
旦相拋棄骨肉成悲愴

九嗟蕪菁根臘月徧地掀富兒攜市賣貧兒竊取吞苦
葉能幾何荒野已絕痕

猛虎行

管 楡

山南白晝猛虎來柴門竟日常不開邨東少婦血漬草
邨西老翁骨成堆官府明文下獵徒邨舍奔走相號呼
入門不顧索雞酒由來苛政猛於菟亦毋張爾弓亦毋
亡爾鏃明朝羣起頌相公虎畏相公渡河北

賣魚婦

江刻

賣魚婦街頭哭。籠布裹頭頭髮禿。短衫碎盡裂不縫。赤
日炎炎灼皮肉。生計蒼茫煙水窟。歲旱河乾少魚鼈。終
宵舉網不盈筐。提魚換米兒望孃。魚價苦賤米價昂。賣
魚未足充飢腸。紅纓皂隸公門虎。路狹相逢何遽怒。朝
來祈雨斷宰屠。敢賣鮮魚忤官府。頃筐奪得免經官。漁
婦泣途魚泣釜。行過屠門肉價高。聞道得錢皂隸許。空
手歸來日已昏。兒女牽衣催煮飯。傷心告兒須忍飢。夜
夜明星天正旱。

鑿石謠

汪沆

朝鑿石南山山脊白於雪暮鑿石北山山坳陷百尺兩
山之下墓纍纍新鬼含怨故鬼悲試問鑿石何所爲盜
疊假山官不知城外之墓家家有鑿石不休痛疾首誰
與大書深刻禁穹碑賴有良二千石鄒太守

公名應元
無錫人

貴人出巡歌

袁枚

一龍上天百蛟舞狐假虎威威勝虎龍虎無心欲害人
此輩獐獐爭攫取婢下有婢號重儻奴外有奴難悉數
投鼠思器隱忍多積習成風人世苦君不見霍家奴欲
謁御史門御史跪奴乞奴恩又不見爾朱僕主人敝衣
僕華服輿夫兩臂金釧雙身坐高車人側目蜀中男子

張君嗣受人送迎疲欲死人自敬丞相與張無與耳趙儼偶然問服散頃刻藥物堆如山方知言語正不易捕風捉影生波瀾古來豪貴皆如此此弊於今尤甚矣門外已費于黃金門內未飲一杯水我戒貴人慎出巡重門洞開休養尊先能察下才安民不然懸魚瘞鹿徒作僞一琴一鶴能污人。

固原

破毒碑

除腳匱也

爲固原吏目張傳心作

蔣士銓

官吏甘心作五毒齧齧公行萬民哭民車盡官車官驢盡民驢有錢買放去官字驅車趕驢來趁墟此錢何名曰腳匱作俑誰興在官利賣鞍焚軸免當差十次官差

無一次張公切齒髮上衝恨官賊民力窮日發文書
四五封州府司院請命同上司準此除虐政解毒從茲
救民命萬民爭立解毒碑車作歡聲驢淚垂

石匠行

李調元

有翁折腳唬道上皮肉淋漓新喫杖如狼差吏驅出門
不許攔街呈訴狀旁人指點翁來因舊是南山伐石匠
問翁何爲遭鞭箠眉皺胸填氣沮喪往時縣中例立碑
去思德政屹相向不知有益黔首無名謂甘棠何足讓
十字市口樹如林幾欲斲盡青山嶂自吾祖父供此役
日往高巖親度量車輦夫扛百不停巍巍戴萬人仰

立時官府顏色歡給賞纔足沽邨釀此項名爲里下派
付曾一家解索償而今室內無一丁只餘老身權補放
字刻青天過手多至今名姓半遺忘朝來新令初升堂
便有循聲千口颺不卽鳩工垂不刊龔黃未免心怏怏
昏夜傳呼急於火天明縣前聽點唱可憐蕭條一細民
囊橐無錢倩誰餉今者稍稍愬私情拍案立即遭考掠
君看腰間錘與鑿薄技陷人無地葬但使官名果不朽
身雖餓莩亦何妨

販夫歎

吳霽

蝸蟾沸高林蟋蟀嘒空谷朝作千錢販暮持數升粟升

粟莫言少干錢莫言多南溪買魚蝦北邨買雞鶩縣帖
昨夜下禱雨迎大士宰割例有禁申嚴徧塵市縣胥揚
揚去販夫貿貿來奈何相迴避中道爭喧逐再拜白縣
胥甯知生計薄販固食不飽不販家何託縣胥怒攫臂
縣帖爾抗諸揚言白縣官攫取仍無餘縣胥相謹去販
夫空擔返行行赴訴誰日中焉得飯南隣宴賓友北里
鳴笙篴嗟哉販夫婦待販舉晨炊錢亦不可得粟亦不
可貰酌水祝大士願與鑒潛翳

兵差行

馮城

鐸鈴夜半傳喧逐連朝驛路飛黃埃羽檄交馳備夫馬

郵卒走報兵差來兵差瀘溪動地至將驕卒悍憑陵氣
噉啗坐索官吏供噍突能令雞犬避深箐危梁亂石灘
鞭笞里役窮登扳科差生同病死苦奔命疲過衝繁難
乾州難民半黔醜雨溜沒髀僵復走丁男不足邨婦來
巖谷追呼更招手山坳按點方竿緡負挑累百數十千
乾沒不已更攘奪狼嗥蟻鬪紛相連前隊已去喘方息
後隊頻臨催霹靂送往勞來難轉輸搜捉洶洶亂如織
卻教糧站作營屯時管糧站暮宿誰能拒壁門兵燹重添俗
吏厄介胄但覺偏裨尊鼓角聲中氣如湧羽林撼踏千
山動安得天戈橫掃劫全消放馬橐弓長不用

快馬來

吳昇

快馬來城門開赭面髯者聲如雷縣官縮匿不敢出但
言下鄉今未回前驅正喧呶後車又雜沓磨刀向豬羊
入市捉雞鴨薪禾倍數供廝役應聲答堂上纔一卮階
下已百榼擾擾走厨人閃閃動風蠟夜深上牀伸兩腳
今日悶飲大不樂

一點牙

王蘇

長官一點朱小民一點血官符出官府炙手手可熱阜
隸東西走伍伯先後行莫怨守捉使朱票有汝名黑索
袖中藏朱票袖中出汝若不見信大令有朱筆朱筆任

意下不方復不圓長官一點朱小民萬个錢

固原破毒碑

除民害也

爲固原吏目張傳心作

周有聲

車曰官車驢曰官驢官安得此腳櫃所驅官恐差來煩
急遞有差但呼腳櫃至焉知此輩喜差來一車一驢皆
足利驅車趕驢送向官腳櫃尙索朝餐錢驢死車摧不
足惜衣囊典盡襦無完此毒流傳聞最久張公一書斷
其後碑名破毒立路隅驢耶車耶終日走君不見豬羊
雞鴨有牙行百姓剗肉充官腸官衙事事類如此無錢
橫索誰能當安得張公再起除民累盡去瓜牙如腳櫃

捉魚行

陶譽相

赤日煉長空火雲散如燬三旬天不雨山塘涸見底老
役持符來奉命索金鯉南邨問漁父漁父臥不起北岸
問罟師罟師翻詆訾老役不敢歸抱泣空潭裏一限青
竹紅再限肉脫髀三限實難堪出境覓隣市一網值千
錢半夜行百里到手幸我生入門恨魚死官價旣逕庭
官秤復倍蓰吞聲不敢言負逋慮干比長歎白老妻老
妻淚如水空室已罄懸鬻彼呱呱子入夜不見兒閉戶
涕不已斯時華堂上笙歌繞朱紫珍羞羅金盤微聞贊
魚美

王廷紹納糧歎見催科門

木簞行

樂鈞

木簞蔽江來黃旛書 上用營繕在有司豈同方物貢

木簞來民船驚 上所用有常程誰敢不讓簞前行

解一

木簞之來或風或雨水手三百氣盛於虎船不及避

擊碎如瓦釜木簞水手猶咆怒船人墮水不死登岸走

如鼠

解二

湯湯運河其狹如帶高寶旣漲河隄旣壞湖

之洶洶不可以杭兮河之湯湯不可以遠望兮

解三

前

有糧艘後有木簞西有湖波維舟乎東涯維不及杙兮

木簞來木簞之來或笑而歌或怒而訶嗟爾民船涕泗

滂沱

解四

道旁歎

張井

道旁有老嫗，僂僂髮似雪。黧面雜泥垢，敗絮衣百結。手持長柄鐮，十步九蹙躓。試問今何爲，欲言先哽咽。老寡窮不死，守此形影子。一椽不蔽風，數畝餘薄少。縣吏昨下鄉，氣象何猛烈。云是達官過，除道要整潔。比戶棄鋤犁，千丁攻窪垤。我田官路旁，亦在除治列。今年春雨多，塗淖深難剝。半月風日晴，泥乾撐凹凸。自維事井臼，業與男兒別。况茲老病兼，曾不飽噉噉。力作已三日，足繭手流血。腹空臂無力，土塊堅如鐵。數畝尚未耕，但恐程期迫。我方奉簡書，聞之心悲切。去去勿復言，使我顏面

國朝詩金
卷之
熱

吳慈鶴大車謠見科派門

吳振棫華筭行見樹菽門

石船行

張鑑

黃河夜決祥符牖會通河水泥一尺大官治河百餘里
朝奏開工伐山石石帆山高入青雲匠人日琢枯泉根
大船連卷一百尺小船拉沓千餘斤擢郎運船猛於虎
估客吞聲不敢語挺然長篙插波心三百青蚨回一艣
得錢夜就倡樓眠歸來掠食仍開船

守行遲

王正誼

牛行遲馬行疾昨日里背徵牛車運送軍裝如火急今日宛轉泥淖中泥淖沒輪行不得將士震怒撻牛主鞭牛不起殺牛食牛死車敝身杖創歸來獨向牛欄泣。

捕捉

錢澄之水夫謠捕匠行
郭鳳喈苦役行

並見力役門

捉人行

劉漢藜

桃葉渡頭行人稀秣陵城中晝掩扉胥吏如虎滿街巷長索繫人如縛豨閭里驚惶皆動色傳聞補伍披鐵衣市人安可驅之戰時事若斯堪歔歔前月舟從江上過萬艇鱗集水邊臥篙師無食妻子愁言待班師將軍坐

吁嗟小民亦何辜水陸一時遭轆軻

捉人行

朱彝尊

步出西郭門遙望北郭路里胥來捉人縣官一何怒縣
官去邊兵來中流簫鼓官船開牛羊橐駝蔽原野天風
蓬勃飛塵埃大船戕戕駐江步小船捉人更無數頽垣
古巷無處逃生死從他向前路沿江風急舟行難身牽
百丈腰環環腰環環過杭州千人舉權萬人謳老拳毒
手爭毆逐慎勿前頭看後頭

誣賭行

折遇蘭

前邨喧呼若鼎沸羣吏捉人人走避老翁頓足老婦號

問君叱咤緣何事健吏嗔日向老翁袖中出票硃圈紅
忽聞誣賭有名字螻蟻命在須臾中農家世世事耕織
擣蒲局戲都不識次男嬌稚未出門長男新歸自塞北
并州豪猾多金銀一擲百萬那足論何不執向官府去
徒爾橫行驚小民里中惡少城中擾厭飫膏粱顏色好
問君養此欲何爲忍以哀鴻飽梟鳥君不見東家兄弟
遭株連鬻田無主不得旋又不見西家父子遭逮累徒
有皮骨無金錢一人被誣十人仆薄言往訴縣官怒官
怒鞭箠尙可支吏怒手足將安措嗚呼木有蠹兮粟有
粃千人指之無病死下民易虐天難欺煌煌聖言猶

在耳

裕州吏

楊倫

暮投旅店宿吏呼夜打門云是郡符下急發南陽軍主
人有子婦三日方新婚捽頭驅之去淚落聲暗吞絲履
五文章單衫蛺蝶裙狼藉收不得翻倒兼瓶盆古來肅
軍律秋毫不擾民。髣髴况野宿何爲重紛紜。我亦被迫
逐中宵動征輪荒雞正喔喔感歎隨吟呻

劉嗣綰起夫歎見力役門

捉驛
車捉船

捉驛行

張映辰

軍行裝載須馬馱大吏檄下徵官騾縣官捉人更捉騾
惟恐濡滯遭譴訶吏人持符下鄉堡虎踞當道森閹羅
行人豈知徵調急纍纍負重來關河道旁忽然遭捉騾
鞭之令下遑問他簷廬貨物都棄置徑牽騾去無誰何
囊金搜取意未厭但飽吾欲還汝騾可憐獨客無齎糧
騾去難行空自傷朔風吹雪盈路旁依人簷下涕泗滂
沱之七日不得去眼見溝壑相填將方今 朝廷愛黎
赤如救焚溺療饑荒轉輸供億出內帑絲粟不以煩編
氓此邦官吏豈獨無聞見胡爲乎縱令若屬爲民殃嗚
呼東鄰有騾不敢畜西家納錢騾亦捉君子耆老盡徒

行鉤衡空駕轅端曲縣官打鼓催騾足吏人告言騾難捉騾難捉錢已足安得年年歲歲將騾捉幾家歡笑一路哭

孫士毅騾車行並見科派門宋銑敝車行

壽陽太安驛書事

王省山

早行太安驛有吏如虎狼攔路捉行車努目爪牙張往來數十乘羈絆盈山莊得錢縱之去無錢空徬徨我來逢鼠輩憤恨結中腸安能傾旅橐以飽蠹役囊征輪不得前且復飲一觴國家設守令百弊宜周防奸宄苟克除乃以安善良政成及商旅行者歌道旁吾思古循

吏仁風遠播揚

捉船行

錢澄之

縣裏今年大捉船有船不近長江邊往時繫纜關江口
如今橫艦截江守戕戕大艚載官離官不放行可奈何
捉船到官候糧久可憐無糧繞船走男兒生計亦無窮
何苦老在波濤中從今應與江神別此生誓不理篙楫
閒得一夜心不休明朝替人駕小舟

捉船行

吳偉業

官差捉船爲載兵大船買脫中船行中船蘆港且潛避
小船無知唱歌去郡符昨下吏如虎快槳追風搖急櫓

邨人露肘捉頭來。背似土牛耐鞭苦。苦辭船小要何用。
爭執洶洶路人擁。前頭船見不敢行。曉事篙師斂錢送。
船戶家家壞十千。官司查點候如年。發回仍索常行費。
另派門攤云雇船。君不見官舫嵬峨無用處。打鼓插旗
馬頭住。

封船行

李念慈

兵舟南來橫河住。河中十日斷行旅。捉船載兵軍檄急。
賈船散逃無處所。被捉倉皇催起載。狼藉裹裝堆岸渚。
船人載兵不得餐。持米偷向艖艫煮。煮成被奪兒女唬。
還恐兵聞肆箠楚。忍飢夫婦雙淚流。夜棄舟航行乞去。

捉船行

鄭世元

客行在西吳。喧呼聞捉船。云奉憲司票。取數須一千烏。
程縣堂曉傳鼓。縣官排衙點船戶。東船西舫寂不行。里
正如狼吏如虎。行人坐守居人困。百里官塘斷商賈。罾
師漁父都含愁。城南城北水斷流。千艘萬艫城中集。葦
岸蘆港風悠悠。大船競輸錢。差役幸暫免。小船無錢只
一身。捉住支吾應供遣。自從名隸公家籍。日日河頭坐
白日。太倉合米聊入腹。誰爲饕餮顧家室。可憐有船何
處撐。江千萬衆俱吞聲。沈歸愚曰。捉船不行。日坐
河干。可發一歎。復一笑也。

捉船行

鮑 鈺

昨者羽書至諸道齊徵兵荊州及江浙虎賁三千名備
邊向滇蜀萬里從軍行水道歷常潤刻期促登程上司
亟申令捉船載行營長吏性火烈咄嗟無畱停伍伯縱
鷹犬扁長如游偵大索逮旬日四境喧且驚千艘連舳
艫齊集杭州城城下方鞠旅沿塘列旒旌慙慙津堠塞
森森刁斗鳴健兒氣驕猛搶攘勢莫撓嗟哉刺船翁白
頭送長征何時達江汴鞍馬任驍騰古云不驛騷紀律
須嚴明願言告都統勉旃報朝廷

捉船行

楊倫

川塗積雪白皚皚打冰一路聲轟隆客子歲暮歸心急

艤舫買得先催開縣符昨下急如火達官當來用船夥
大船放走小船畱三百行舟盡無柁篷底數日斷炊煙
里正猶來橫索錢妻孥蹙頰共歎息賣船始得過殘年
我亦稽畱店中住百里天涯限跬步船邊翻羨鷗鷺飛
振翼江頭自來去

船戶歎

陳文述

前年河水枯舊年河水凍今年春雨少柔櫓澀菱葑帆
檣鱗次排河塹衛丁作勢橫索錢糧艘載貨兼載米米
多起剝須民船官符捉船教捉空胥吏捉船先捉重重
船空船一例捉閒泊河干仍不用有錢空船亦不停無

錢重船亦不行。估客坐愁船婦歎。眼看畫舫春波明年來。衛丁猛如虎。索費無窮窘官府。縣官爲公兼爲私。賸削無非小民苦。衛丁苦官實苦民。丁應日富民日貧。傳聞苦累因北壩。百年民隱誰與陳。羈累無端到行旅。大編峩峩在河渚。糧艘暢行或放汝。私祝河流漲春雨。

捉船行

陸費瓊

淮陽澤國多風沙。居民生計船爲家。百金起船不起屋。船成官帖紛搜拏。但使全家得半食。寸紙斜封敢論直。今日受雇明日行。貧船被驅富船匿。千艘經接黃河曲。折槳敗槳須修築。天妃廟前津鼓喧。驛吏持鞭上船逐。

侵晨叩官分官錢十人赴功五人粥乘船達官方醉眠
船頭歡呼船尾哭

捉船行

蕭 掄

婁江馬頭聚艫舳縣官下符吏來捉捉船云載兵出征
一兵一船亦已足吏胥乘勢橫索錢要令盡數充兵船
大船中船私買脫小船捉得還遭鞭有客乘船方問渡
吏向前津邀勒住驅客上岸客乞哀倒篋傾囊充賄賂
更有田家舴艋船不設帆檣載農具忽有人從縣裏來
聲言欲捉當官去船小如何供應官教儂操舟事更難
不如輸錢求免捉典衣賣犢眞須拚往時捉船困船戶

今日農家亦良苦幸而淮徐旋罷兵吏欲捉船更無名

捉船行

客從丹徒來言剝運捉船事

朱綬

大船戕戕塞江口小船兩槳沿江走官符倉卒捉船來
民船商船齊束手借問捉船何所爲公家轉運有常期
運河水淺不可渡千夫邪許行程遲丹徒閘前暮潮落
舳艫銜尾江皋泊昨日挖河三尺深朝來又見泥沙濁
官中火急催捉船船船並集長江邊船中百貨岸旁棄
篙師估客心煩煎大船裝米數百石虎鬚豪吏相驅迫
小船捉得無所用獻錢始向江邨匿

小船歎

高瓊

官去官來差不停江中日見官船行江中官船不知數
又見官符捉船住大船買脫中船藏小船倉皇避無路
前船已被吏爭捉後船索錢吏更惡官差所用船無多。
船戶家家受劫虐。旣應官差又壞錢如此生涯亦可憐
殺人爲盜尋常事何必區區守此船

大船喜

又

海上烽煙久不息羽書飛到徵兵急官吏持符將捉船
馬頭船已如林立大船一載千萬擔十分之中三分賺
沿江關稅不能逃關征稅取去其半惟有兵差差得過
上載官兵下載貨。油柴鹽米不須錢。歸來還免各關課。

船戶爭趨計懋遷。纔聞差到卽爭先。行中使費包私貨。
衙內資緣送例錢。兵差差罷船仍在。去也如飛來也快。
不怨兵差歲歲多。只願兵差得常載。

捉船行

王柏心

沿江舟子竊相語。聞道南軍捉船戶。健兒應募充長征。
東下雷池更鵲浦。船頭躍立先拔刀。手持軍帖氣勢高。
紅旗擲出插船首。語汝船戶安敢逃。船戶跪垂涕。風波
恐留滯。津渚多未諳。生理憂不繼。軍人怒莫當。我往無
宿糧。主將示恤士。掠貲佐行糧。大船小船犒緡錢。橫搜
豪攫盈腰纏。軍人醉飽買歌舞。船戶踉蹌哭向天。我聞

軍興未闕餉舟車權算道相望師行紀律何爲哉此曹
橫掠最無狀沿江今見捉船勇入陣誰知見賊恐貪貲
仍復惜頭顱增軍百萬徒成冗誰其言諸驃騎營滅賊
不須多募兵兵多更苦劫賊多日毒生民將奈何

官馬

田雯送馬吟見科派門

官馬行

李良年

北方高涼多種麥麥若不登農絕食何爲卻種官路側
日操豚蹠視高岡馬來但趨路中央錫我歲入如茨梁
嗟爾何愚抑何瀆馬不食麥天雨粟不若持竿事驅逐

錦衣使者來如雲。駸駸歛忽數十羣。老農哀呼馬不聞。
朝田青青暮荒土。縣符催輸猛於虎。田家明年祀馬祖。

官馬行

朱 樟

皇華驛前相官馬。太息一回幾泣下。馬何不幸登官槽。
腰帶瘡口皮無毛。後蹠線痕接烙印。骨格尪羸豈神駿。
借問此馬何其疲。連年多被大差騎。大差抽騎誰敢惜。
爭向驛亭橫需索。丞何人斯能舉肥動言官馬不任轡。
就中最畏廝養卒。鞭向危崖誤一蹶。人無苞苴馬不前。
一馬死時官墊錢。以錢償馬馬乃壽。馬曹性命懸伊手。
三年馬價盡折乾。翦取耳尾還交官。嗟爾何冤事筆楚。

馬本無知爾何苦願遷怒馬怒於人庶幾不傷天地仁
君不見玉街春試桃花驪珊瑚鞭緩踏青游馬肥乃喜
馬瘠嗔奚官寵辱繫馬身牽向柳陰頻歇力弄影行驕
更迢逸同然一馬貴賤殊伏櫪誰憐血汗駒近聞火牌
又下迎天使九折坂前看馬死

官馬行

孫士毅

官馬行行何遲馬老不足供鞭笞官馬行行何瘦肥馬
多在胥吏廐稽一束豆一升草頭一點如飛鷹歸來髀
肉戰生蠅芻在槽馬在野長官飛帖驛丞驚明日看花
要快馬

官馬過

劉嗣綰

官馬過馬牌踉蹌馬兵臥官傳令馬前驅馬不前使馬
鞭馬不能言馬牌哭官減馬糧入官腹年年養馬常苦
飢一朝用馬馬銜悲嗟嗟馬敢愛死力但使官家無害
馬馬死長途亦不惜

官棧馬

陳均

官棧馬官簿錄棧中馬少官徭多奴沒馬錢例不足朝
迎貴官來暮送豪家宿前棧既無芻後棧更誰牧途長
馬飢行不速瘦骨敲銅任鞭撲踉蹌幸駐驛前足揭鞍
并揭馬背肉汗流喘息毛蜩張忍痛悲嘶聲似哭回頭

卻見使者驄連錢帖金鏡懸玉尋常芻豆不肯嘗卻打
里門求苜蓿

養馬行

王文瑋

營中養馬馬日瘦兵丁食糧兼食豆持鉞將軍來演兵
馬蹏落落如人行弓弦不作霹靂聲但聞中的高呼名
君不見教場昨試大宛馬將軍折脅墮馬下

附
驛卒詞

薛所蘊

閭閻困敝乏幫貼差煩馬瘦芻茭絕典妻鬻子敢辭苦
惜馬無錢動捶楚聞道軍中馳告語一日一夜行千里
昨年偶爾悞一時縣官逮治驛卒死五更三點不交睫

頭枕驛門候消息

馬草

馬草行

吳偉業

秣陵鐵騎秋風早
廐將圉人索芻藁
當時磧北起蒲梢
今日江南輸馬草
府帖傳呼點行速
買草先差人打束
香芻堪秣飽驂驅
不數西涼誇苜蓿
京營將士導行錢
解戶公攤數十千
長官除頭吏乾沒
自將私價僦車船
苦差常例須應免
需索停畱終不遣
百里曾行幾日程
十家早破中人產
半路移文稱不用
歸來符取重裝送
推車挽上秦淮橋
道遇將軍紫驪鞚
轅門芻豆高如山

長衫沒髀看奚官。黃金絡頭馬肥死。忍令百姓愁饑寒。
回首當年開僕監。龍媒烙字麒麟院。天閑轡逸起黃沙。
游牝三千滿行殿。蔣山南望獵痕燒。放牧秋原見射鵰。
甯莖雕胡供伏櫪。不堪極目草蕭蕭。

喂馬行

戴明說

鎧甲遍城潦遍野。檄文傳喂南征馬。里正中宵布裹頭。
顆粒寸草逢人求。南陽處處經征戰。輪蹄一沸十三縣。
有檄但促征豆芻。將軍額外還折夫。一夫數金囊橐好。
復驅市人斲馬草。箕踞怒箠五十日。罷耕撤肆奔潦倒。
市人逃死小吏危。中夜忻然投白水。妻孥已盡茅簷燬。

但避誅求死亦喜

詩觀評哀慘之極如聞邊歌野哭

芻豆行

趙進美

大船十丈如連屋小船數尺走相逐白浪十月高於山
大船小船浪中宿漁船最小如鳬輕漁婦赤腳牽纜行
破席作帆不得挂持篙逆浪難未鳴雞鳴喔喔霜在鬚
五船載豆十載芻借問何往軍前須西走溯江南越湖
荒邨瓦飛船尾轉水氣昏濛日易晚蛟龍欲與戰士爭
羽書詎責風伯緩憶昔年豐歌納稼青芻之微豈論價
自從烽火傳江邊城中鬻女邨鬻田陸行負戴水舟楫
一束近欲值千錢吁嗟遺民經亂少安棲卑雜魚鼈高

狐狸復見逃亡餘敗堵苦陳敲扑無完肌昨聞軍符夜
深至朱批白版數行字空城人稀鵠鵲嘯郡吏無言顧
縣吏

運豆行

劉漢黎

大梁城南黃塵起牛車千羣連郊鄙道傍輿夫向我言
昨夜府帖下州里云是南征戰馬過槽籩催輸如流水
更兼運豆充芻牧委積如山誰能紀數鍾僅能致一斛
晝夜鞭策無停晷固是官廩要馬肥那惜窮民竭脂髓
今春載草向襄城一束百錢猶云輕野外處處插草廠
堆如山嶽勢崢嶸究竟官馬不喫草遍地禾苗無西莖

猾吏賣草充私橐。小民有口誰敢爭。今冬過馬能幾何。
有司徵豆數萬多。近者百里遠數百。稍遲輒遭長吏訶。
自從湖南動戈鋌。每歲常經數往還。中原況值瘡痍後。
民力久盡黃河邊。徵徭煩重充私橐。供億艱辛絕可憐。
誰人肯下賈生淚。封書一奏聖人前。

牧馬行

張新標

軍符日夜徵馬草。官差絡繹長河道。打草堆積高如山。
斂盡民財供宿飽。須臾龍種拂潮來。碧髯紫眼健兒催。
公家芻茭任狼藉。需索畱難勢若雷。初聞信宿南城下。
忽漫奔馳遍四野。長吏趙趙未敢前。傳云奉文駐牧者。

今年洪水拍天長。纔餘隙地補稻梁。官租私債望收割。
忍同苜蓿供騰驤。况復稻肥馬不食。踐踏盡委泥沙側。
揚鞭四出捉行人。近城五里斷消息。兒奔女竄掩蓬蒿。
遍處輪蹄孰遁逃。已飽饕餮志未厭。更索金錢氣益驕。
人命摧戕輕若土。紛紛捆載何須數。前軍聞已渡河梁。
後軍仍有十日住。臨行搜括更煩冤。千家今有幾家存。
雀噪猶如新戰壘。人歸無復舊柴門。呼天搶地嗟何及。
東鄰覓子西鄰泣。收拾餘燼晨未炊。徵租虎吏溪邊立。

詩觀評民間疾苦說
得極痛快極纖細

馬草行

朱彝尊

陰風蕭蕭邊馬鳴健兒十萬來空城角聲鳴鳴滿官道
縣官張燈徵馬草階前野老七十餘身上鞭扑無完膚
里胥揚揚出官署未明已到田家去橫行叫罵呼盤殮
關牢四顧搜雞豚歸來輸官仍不足揮金夜就倡樓宿

官草行

徐賓

黃雲壓城雪晶晶轂摩軫接輸官草中有一車委道傷
一牛僵死一軸倒車尾哀哀哭小童車前坐歎垂白老
問之云是此邦民離城百里居山堡宣化城中馬萬餘
官司發錢買禾槩一日須用幾萬束邨邨輸輓猶嫌少
價值騰貴不可支賠補購辦分所宜連宵備得草數足

僱車覓牛恐稽遲。衝冰犯雪行三日。崎嶇歷盡嶺與陂。
那知交納有新例。無錢不收徒嗟咨。連朝候收資斧竭。
人無宿食牛亦饑。昨夜西風冷刺身。牛如蝟縮死車塵。
今早官衙當比較。伍伯奉令來拏人。兒子捉去幼孫哭。
老病枵腹守車輪。不愁凍餒無糗糒。只愁兒子久冤累。
不愁牛死并孫哭。只愁此草交非易。老翁老翁勿復言。
我是關南牧馬吏。

效樂天體詩之一

劉青藜

驛馬有常額。飼秣支天儲。如何千邨裏。計口具青芻。
一丁三十束。束必十束逾。昨有農家子。滿載充官需。主者

不時收遷延日欲晡低聲前致辭某里某甲輸委積雖
滿地僅作一束餘跣跟出廐門仰天號路衢行人來借
問自言生何辜家無一稜田派名日追呼聞說官給直
何曾見錙銖老吏動咆哮逼索如催租屈指營辦足翻
謂有餘通勸爾且吞聲努力完須與明朝急符下行行
就囚拘

馬草行

俞鼎

滄洲烽火徹夜紅援師奉調來南中援師五千馬萬匹
所過軍營吹簫策縣尊索草候經臨硃票紛紜遠近出
家家并日辦馬槽辦豆更辦刈草刀草船滿滿連百艘

馬草積如山岳高援師驅馬江干過餘草零星棄道左
老農束取負擔歸燃草煮豆聊充飢吏役首告盜官貨
哀哉愚民家頓破

官馬補

驛馬行

林則徐

有馬有馬官所司糾之欲動不忍騎骨立皮乾死灰色
那得控縱施鞭筆生初豈乏颯爽姿可憐郵傳長奔馳
昨日甫從異縣至至今不得辭韁轡曾被朝廷參養恩
筋力雖憊奚敢言所嗟飢腸轆轤轉祇有血淚相和吞
側聞駕轡重考牧帑給芻錢廩供菽可憐虛耗大官糧

盡飽閑人圍人腹況復馬草民所輸徵草不已草價俱
廐閒槽空食有幾徒以微畜勤縣符吁嗟乎官道天寒
齧霜雪昔日蘭筋今日裂臨風也擬一悲嘶生命不濟
向誰說君不見太行神驥鹽車驅立仗無聲三品芻

國朝詩鐸卷九終